


Die Matie

TWEEWEEKLIKSE STELLENBOSSE STUDENTEKOERANT
UITGEGEE ONDER BESKERMING VAN DIE SR



Jaargang XLII Nr. 7

DONDERDAG, 31 JULIE 1986

Monster besluit oor oop koshuise

Mandela se vrylating ook vanaand bespreek

Deur
BARRIE TERBLANCHE

STUDENTE besluit vanaand om sewe-uur op 'n monstervergadering in die Stadsaal of universiteitskoshuise vir alle rasse oopgestel moet word.

Op dieselfde vergadering sal 'n tweede mosie, wat vra vir die vrylating van Nelson Mandela, leier van die ANC, en alle ander politieke gevangenes, ingedien word.

Die SR-voorsitter, mnr. Phillip Verster, het die mosie oor die oopstelling van wooneenhede op kampus voorgestel. Mnr. Johan Theron, sekretaris van die SR, en mnr. Frans Volschenk, SR-lid vir Studente- en Akademiese belange, is die sekondante.

Pogings

Volgens mnr. Verster blyk dit uit 'n onlangse behoefte-opname dat woongeriewe vir bruin en swart studente onvoldoende is.

Hy het gesê dit is onnatuurlik dat studente van alle rasse nie saam in koshuise mag bly nie.

"As ons alle mense in Suid-Afrika as gelykes beskou en saam op universiteit klas mag loop, kan daar nie beswaar gemaak word teen saam woon in koshuise nie," het mnr. Verster gesê.

Studente het in die verlede verskeie pogings aangewend om die koshuise vir alle rasse oop te stel.

In 1981 het bykans drieduisend studente 'n petisie ter ondersteuning van 'n referendum oor die oopstelling van die koshuise geteken. Die referendum is afgestel nadat die Rektor, prof. Mike de Vries, met studente oor die aangeleentheid gepraat het.

Die Studenteparlement het in 1983 die Universiteitsowerhede versoek om die beperkende maatreëls op gekleurde studente op kampus te ondersoek.

Kampusleiers

In 1984 is 'n meningsopname op versoek van die SP in die kiesafdelings gehou. Sestien uit die 22 koshuise het teen oopstelling gestem. Wilgenhof, wat met 'n groot meerderheid vir oopstelling gestem het, was een van vier koshuise wat ten gunste van oopstelling was.

Die meerderheid kampusleiers wat genader is, steun oopstelling.

Mnr. Barry de Wet, primarius van Huis Marais, het gesê hy het nie teen die oopstelling van die koshuise nie. Hy voel ongelukkig omdat oopstelling op 'n monstervergadering bespreek word omdat "gevoelens van anderskleuriges gewaag kan word deur opmerkings wat regre groepe moontlik op die vergadering kan maak."

Die primarius van Simonsberg, mnr. Steve Malherbe, het gesê stemming oor oopstelling behoort in die koshuise self geskied.

"Die besluit raak die inwoners van koshuise en daarom behoort



JACO MALAN, wat die mosie oor die vrylating van Nelson Mandela ingedien het.

hulle daarvoor stem," het hy gesê. Volgens mnr. Malherbe is die monstervergadering op 'n baie ongeleë tyd, want dit val saam met "sing-songs".

Oplossing

Die ondervoorsitter van die KP-studentetak op Stellenbosch, mnr. Emile Wessels, meen oopstelling van die koshuise sal tot rassekonflik lei.

Die tweede mosie, wat vra dat Nelson Mandela en alle ander poli-

tieke gevangenes vrygelaat word, is deur mnr. Jaco Malan, voorsitter van SAAK, ingedien. Die sekondant is me. Tanja Hichert, 'n tweedejaar-student in die regte.

Mnr. Malan het gesê hy het genoeg vertroue dat daar studente is wat besef die standpunte van die Regering geen oplossing vir Suid-Afrika se probleme bied nie.

"Die ANC is die mees populêre politieke party in Suid-Afrika, en die wettiging van die organisasie is 'n voorwaarde vir 'n vreedsame oplossing.

"Die vrylating van Nelson Mandela en alle ander politieke leiers kan nie losgemaak word van hierdie noodsaaklike wettiging nie," het mnr. Malan gesê.

Verlede semester het twintig studente-leiers, onder wie verskeie Studenteraadslede, 'n ope brief onderteken waarin die vrylating van Nelson Mandela en die wettiging van die ANC versoek is.

'n Mosie teen die ope brief, wat onder meer vra dat daar nie met die ANC onderhandel word voor dié organisasie geweld afsweer nie, is ook vir die monstervergadering ingedien.

Die voorsteller, mnr. Francois Schoombee, voorsitter van die Stellenbosse Studente Gesprek, het later die mosie teruggetrek.

Die voormalige voorsitter van die NP-studentetake, mnr. Barnard Beukman, was die sekondant van die mosie.

Volgens mnr. Beukman sal hulle standpunt duidelik genoeg gestel word indien die mosie oor die vrylating van Nelson Mandela afgestem word.



JOHAN THERON en FRANS VOLSCHENK, sekondante van die mosie oor die oopstelling van koshuise.



PHILLIP VERSTER, voorsitter van die Studenteraad, wat die mosie oor die oopstelling van koshuise ingedien het.

'Subversiewe' mosie oor noodtoestand afgekeur

'n MOSIE waarin die afskaffing van die noodtoestand bepleit word, is deur die sekretaris van die Studenteraad, mnr. Johan Theron, afgekeur.

Mnr. Theron het in oorleg met die Uitvoerende Komitee van die SR die mosie afgekeur nadat brig. Fourie, distrikskommissaris van die Polisie in die Bolland, gesê het die mosie is subversief en dat hy ingevolge die noodmaatreëls die vergadering sal verbied indien die mosie bespreek sou word.

Mnr. Theron het gesê ook regsadviseurs het die SR gewaarsku teen die bespreking van die mosie.

Mnr. Andries du Toit, die voorsteller van die mosie, meen dat die mosie nie ondermynend is nie. Volgens die interpretasie van die noodmaatreël deur Nussas-regsverteenwoordigers sal die mosie nie as subversief beskou word nie, het hy gesê.

"Die noodmaatreëls is só vaag dat die Ope Brief ook as ondermynend beskou kan word," het hy gesê.

'n Ander mosie, waarin onder meer gevra word dat die ANC geweld moet afsweer voor daar met dié organisasie onderhandel word, is deur die voorsteller daarvan, mnr. Francois Schoombee, teruggetrek.

Mnr. Schoombee, voorsitter van die Stellenbosse Studente Gesprek, het gesê die monstervergadering is nutteloos en dat hy sy mosie teruggetrek het met die hoop dat die ander mosies

ook teruggetrek sou word. Die SR-voorsitter, mnr. Phillip Verster, het gesê die terugtrek van die mosie dui op onsekerheid by die voorstellers oor wat in die mosie staan en op 'n tekort aan selfvertroue.

Volgens mnr. Barnard Beukman, sekondant van die mosie, staan hulle "ten volle en met selfvertroue by die Schoombee-mosie".

Hulle het ná herooring bespreek sou word.



BARNARD BEUKMAN

sluit die Schoombee-mosie is te wyd vir die monstervergadering, het mnr. Beukman gesê.

"Ons wou 'n algemene politieke mosie vir gematigde studente indien, maar dit het later geblyk die monstervergadering nie daarvoor geskik nie.

"As die mosie oor die vrylating van Nelson Mandela verslaan word, sal ons standpunt in elk geval duidelik genoeg gestel word," het hy gesê.



"groot brag"

"Kom sing en kyk wie's julle manne"

Die Tassenberg legende leef voort

plek: Die Gat

datum: 7 Aug. '86

tyd: 8.45nm

maties vs
intervarsity '86 ikeys

Tassenberg